

ESCRITURO NOSTRO

Un nouvèu rouman, “Lou triounfle de Bèu-Caire” de Bernat Giély, a creba l’iòu... (pajo 9)



Prouvènço d'aro

Tóuti li mes, lou journau de la Prouvènço d'aro

Abriéu de 2019

n° 353

2,10 €

Pas de Prouvènço sènso Prouvençau Rampelado de z-Ais

Pèr la defènso de nosto lengo dins l'Educacioun Naciounalo, pèr sa valourisacioun e pèr restabli li poste e lis ouro que soun estado supremido dins li coulège e li licèu pèr la rintrado 2019-2020 :

* Demandan au nivèu naciounau que l'oupcioun Lengo Regionalo siegue alignado sus li couëficiènt di Lengo de l'Antiqueta, Latin e Grè.

* Demandan au nivèu academique la creacioun dis especialita Lengo Regionalo au meme titre que li lengo vivènto.

* Demandan au nivèu academique que li percours bilengue e li resau : escolo, coulège, licèu siegon encou-
raja e mes en valour.

* Demandan au nivèu academique que de mejan especificque Lengo Regionalo siegon remés en plaço pèr evita la forço grandò councurrènci emé lis àutri matèri dins li coulège e li licèu.

* Demandan que siegue restabli lou poste de Councièr Pedagougique pèr l'escolo primàri dins li Bouco-dou-Rose, brutalamen supremi aquèsti darnié jour.

Nosto lengo es un dis elemen foun-
dadou de l'identita de nosto region,
de noste país e di culturo de la
Mediterragno. Pèr bèn counèisse e
coumprene nòsti territòri, noun se pòu
ignoura la lengo e la culturo milenàri
que porton.

Óubrida la lengo d'Oc es pas un signe
de moudernita, mai uno perdo de
sustànci.

Despièi de decenio, li porto dis esta-
blimen escolàri de l'acadèmi d'Ais-
Marsiho se soun prougressivamen
duberto à soun ensignamen dins l'en-
castre d'uno countinuèta remarcabla.

La manifestacioun de z-Ais



Es poutaire d'aquéu message que lis assou-
ciacioun de defènso de la lengo an souna
la rampelado e se soun moubilisado pèr
manifesta lou dimècre 20 de mars davans lou
Reitourat à z-Ais de Prouvènço.

Emé l'intersendicalo dis ensignant, èron
aqui li sòci dis assouciacioun : l'APLR,
Assouciacioun di Proufessour de Lengo
Regionalo, lou Forum d'Oc, la Mantenènço
de Prouvènço dóu Felibrige, Lou Prouvençau
à l'Escolo, l'Unioun prouvençalo, li Calandreta,
l'Istitut d'Estúdi Ocitan, l'assouciacioun Bèn
Lèu, l'Assouciacion pèr l'Ensignamen de la
Lengo d'O, la Federacion dels Ensenhaires
de Lenga e de Cultura d'Oc, emai lou CREO-
Tolosa.

Lou trepadou dóu reitourat de z-Ais èro clafi

de mounde aquéu dimècre de printèms emé
en man de bandiero, pancarto, bandeirolo
e drapèu pèr bèn moustra l'estacamen à la
lengo e la culturo prouvençalo di manifestant.
Demié li persounalita, lou Councièr municipi-
pau de la vilo, Arvè Guerrera èro aqui emé
la taiolo bluiò, blanco, roujo dis elegit, pièi
se troubavo tóuti li baile di gràndis assoucia-
cioun prouvençalo e ocitano que sarié trop
long d'enumerar, mai que manquèron pas
aquel impourtant rescontre.

Li sindicat dis ensignant, lou porto-voues
en bouco, esplicavon coume se passavo
dins soun mestié, falié pas rena contro la
supressioun de poste de travai, sa ierachio
ié demadavo rèn mai que d'èstre souldari
d'aquéu sacage.

Tout acò levavo debat dins lou mounde aqui
presènt.

D'uni avien encaro en memòri li responso dóu
direitourat de l'ensignamen en Vau-Cluso pèr
justifica la supressioun de cours de prouven-
çau : — *Aquelò lengo s'ausis plus sus li mar-
cat, adounc fau arresta.*

Falié veni aquéu 20 de mars sus la plaço
Lucian Paye à z-Ais, l'aurien ausido aquelò
rebello lengo d'oc e que creson pas que lis
aparaire van arresta la batèsto davans de
pariès espaurimen.

Pièi, vai sènso dire, que l'Educacioun naciou-
nalo es centralisado. La gouvèrnànço se fai
à Paris, li founciounari de prouvinço an pas
gaire de poudé, se dèvon de pouta respèi i
reformo de soun menistre...

Nòsti pichòti patriò

Identita regionalo e Estat
centrau en Franço dis óuri-
gino à nòsti jour.

Pajo 2

La lirico di troubadou

Uno obro di bello dins lou
gènre de la proupagando
poulitico...

Pajo 7

Traumatisme d'enfanço

Emé Farfantello que soun
mau d'escrièure èro soun
mau d'enfanço...

Pajo 3